

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 13.12.2012 18.05 Uhr auf 94.0 bzw. 87,7

Moin, leev Toehörers,

mit 'n Spölbericht van Kickers Emden kann ik disse Week weer neet denen. Dat Spöl tegen Germania Leer is lesd Freedag ofseggt worden. Ok dat Spöl Sönndag tegen Spelle-Venhaus in Emden is ofseggt worden, nettso as all anner Spölen in de Landesliga Weser-Eems. Kickers Emden hett bither blot 16 Spölen utdragen un liggt up de 12. Platz mit 23 Punkten. Brake un Union Lohne hebben al dree Spölen mehr utdragen, man de hebben blot 3 Punkten mehr as Kickers Emden. Wenn Kickers de Spölen all nahaalt un 'n paar dorvan winnt, dann sücht dat gaar neet maal so schlecht ut för de jung Mannskupp.

Freien wi uns also up dat komende Jahr, wor dat dann weer mit Punktspölen lös geiht.

An Enn van dit Jahr steiht ja weer, nett as all Jahr, de Stadtmeisterskupp in de Emder Nordseehall up Programm, de van de Oldenbürgische Landesbank - heet ok OLB-Cup – sponsert word. Dat eerst Maal up Kunsstoffrasen. Bün gespannt, wo sük Kickers Emden dit Jahr sleit. Bevör ik 'n lüttje Wiehnachtsgeschicht vertell, de mit Foetball wall nichts toe doen hett, aber heel lüstig is, much ik Floetlücht-Moderator un Kickersfan Berthold Janssen toe sien 50. Geburtsdag, de he mit Bült Frünnen lesd Saterdag in 't Sportheim in Barenbürg mit 'n lecker Eten fiert hett, graleren.

So, nu aber toe de Wiehnachtsgeschicht:

Dat gung up Wiehnachten daal. Gretjemöh satt in hör lüttje Köken un dee in 't dat Bladd (Zeitung) lesen, dat hör Naberske hör immer 'n Dag later broch. Gretjemöh was 'n arm Minske, se kunn sük keen egen Bladd kopen. Se harr bold nix. En bietje Geld kreg se van 't Sozialamt. Dor kwamm se nett' so mit over de Runnen. Nu stunn Wiehnachten vör de Dör, un se harr annern ok so geern 'n Bliedskupp maakt. Man wormit? Nu leest se in 't Bladd, dat man an d' Wiehnachtsmann schrieven kunn. De dee up elke Breev antwoorden, stunn dor in. Un do kreg se 'n Gedank, de se ok glik utföhrte. Se schreev an d' Wiehnachtsmann un froog frünnelk an, of he hör neet 'n 100 Eurosken stüren kunn.

Up Postamt wussen se mit de Breev nix antoefangen. Se gaffen de bi 't Finanzamt of. De Baas van 't Finanzamt harr Mitleed. He leed 'n Sammellist in sien Amt rumgahn. Sülvest drog he sük as eerst mit fiev Euro in. An Enn kwammen 70 Euro toesamen. Disse 70 Euro stürte he Gretjemöh mit 'n moi Anschrieven toe.

Junge, wat hett Gretjemöh sük freeit. Heel hunnert Euro wassen dat ja wall neet worden, man ok mit 70 Euro was se best toefree.

Glik na Wiehnachten schreev se weer an d' Wiehnachtsmann. Se bedankte sük heel hartelk för dat Geld. Aber se beedt hum, wenn se anner Wiehnachten weer bi hum na 'n 100 Euro nafragen sull, dann much he dat Geld doch neet over 't Finanzamt stüren. Denn de harren dor glik 30 Euro van oftrucken.

Ja, so kann't lopen.

Leev Toehörers van Radio Oostfriesland,

dat was dat weer maal för disse Week. Ik wünsk Joe moi dart Advent un bietje Ruh van de heel Gedruus in disse Dagen.

Un ik hoop, Joe hett dat Plattdüütsk gefallen, denn mien Motto heet ja alltied, plattdüütsk dürt - nettso as Kickers Emden – neet unnergahn.

Bit anner Maal
Joe
Erich Bolinius
ut Emden-Petjem (Petkum).